

廣州府志卷一百四十一

列傳三十 方外二

三藏法師 漢

迦摩羅 晉

慧敬 法獻

求那跋摩 宋

智藥三藏

貞靜禪師

菩提達摩

景泰禪師 曇裕

跋多羅三藏

靈靄 以上梁

拘那羅陀 陳

三寶禪師

法善

吉藏 以上隋

休咎禪師

譚公道

惠能

荷澤禪師

志道

一行

廣州府志

卷一百四十一

列傳三十

黃雲元禪師

金剛仙

歸南

僧通

眞教禪師

仰山慧寂通智禪師

惠懿 匡緒
以上唐

聰公

達岸禪師 以上南漢

圓禪師

祖堂禪師

善會

麥祖用

賓公

行宣

祖演

普通

神定道人

惠洪

了玟

復庵

樸庵

古溪

清一叟

定應無際禪師

德欽
以上宋

湧東海

曇稷

慧顯

德清

無我

永纓

吳道人

真空禪師

在轡

函可

十力禪師

栖壑和尚

石洞禪師

崇範

性顯

空隱禪師

元亮

函是
以上明

阿字

今回

今離

今辯

廣州府志

卷一百四十一

列傳三十

二

今壁

今佛

今端

今錫

今沼

今覲

今楮

今毬

古詮

古電

古義

古易

古檜

成鷲

六逸
通詞

元默

古雲

古奘

大瞻

傳晟

古通

古行

古鍵

今嚴

今印

寒山

開訶

知通

慈湛

自渡

成鑑

源子

以上國朝

趙棠

許道人

蔡公

黃道姑

以上附志

漢

三藏法師曇摩罽賓國僧也安帝隆安間至廣東于城西虞翻苑創梵刹曰王園寺宋永初間有梵僧永那陀羅三藏飛錫至此覩茲地之勝復依寺右創戒壇立制止道場懺曰後

有肉身菩薩于此受戒

即宋咸清中所建大鑿殿至唐神龍元年宗印上三藏法師般刺密諦復

至寺譯大佛頂首萬行楞嚴經浮山南樓寺沙門懷迪譯菩提戒唐相房融筆受之寺今光孝寺楞嚴經之傳實自嶺

廣州府志

卷一百四十一

列傳三十

三

南始云
郭通志

晉

迦摩羅者梵僧也以太康二年自西竺來於城中建三歸仁

王二寺今其故址猶存

黃通志

釋慧敬法獻皆廣州人晉宋間潔誠秉教興崇梵刹為南徼一時之盛敬有小沙彌為山魅所擊魅忽見形詣師具謝云部屬不諳師德橫撓眷屬罪坐主者弗嚴持用展釋又獻師宴山寺素閒寂無人忽有兩童子攜手歌于師之前曰藏微有道德懽樂方未央歌罷忽不見

張府志

宋

求那跋摩累世為王年十四便機見雋達年十八相工見而謂曰君年三十當臨大國南面稱尊若不樂世榮當獲聖果

至年二十出家受戒乃辭師違衆林棲谷飲遯跡人世元嘉初文帝知跋摩已至南海于是勅州郡合資發入京路由始興經停歲許始興有虎市山峯嶺高絕跋摩謂其髣髴耆闍乃改名靈鷲于山寺之外別立禪室去寺數里磬音不聞每至鳴椎跋摩已至或冒雨不霑或履泥不濕時道俗莫不肅然增敬寺有寶月殿跋摩于殿北壁自畫羅漢像乃作定光儒童有布髮之形像始成之後每夕放光此山本多虎災自跋摩居之晝行夜往或值虎者以杖按頭戲之而去於是山旅水賓去來無梗嘗於別室入禪累日不出寺僧遣沙彌候之見一白獅子緣柱而立亘室彌漫生青蓮花沙彌驚恐大呼往逐獅子豁無所見後文帝重勅觀寺等復更敦請乃汎舟下都以元嘉八年正月達于建業文帝引見因問曰弟子

常欲持齋不殺不獲從志法師既不遠萬里來化此因將何以教之跋摩曰大道在心不在事法由己非由人且帝王與匹夫所修各異匹夫身賤名劣言合不威若不克己苦躬將何爲用帝王以四海爲家萬民爲子出一嘉言則士庶咸悅布一善政則神人以和刑不天命役無勞力則使風雨適時寒暖應節百穀滋繁桑麻鬱茂如此持齋亦已大矣不殺亦已衆矣詎在闕半曰之殮全一禽之命然後方爲宏濟耶帝乃撫几歎曰夫俗人迷于遠理沙門滯于近教迷遠理謂至道虛說滯近教則拘攣篇章至如師法所言眞謂開悟明達可與言天人之際矣乃勅住祇洹寺供給隆厚

太平御覽

梁

智藥三藏天監元年自西竺航海而來手植菩提樹於廣海

衛城東門外靈湖寺六祖堂前大可數圍高六七丈風搖其葉若驟雨至其葉墜地青綠脫盡而筋絡獨存夾以籠燈若紗縠可愛迄今千餘年茂盛不改其種出西域惟廣城光孝寺有一株高大相類亦智藥所植也

張府志

貞靜禪師舒州上元延祚寺僧也普通中來清遠峽山神化為居士曰峽據清遠上游我欲建道場與師居之是夕風雨大作遲明寺已徙峽山矣師說偈曰此殿飛來胡不飛去聞空中曰動不如靜郡邑上其事聞於朝賜額曰至德寺

張府志

菩提達摩大師者南天竺國香至王第三子也姓刹帝利本名菩提多羅後遇二十七祖般若羅多至本國受王供養知師密迹謂曰汝于諸法已得通量夫達摩者通大之義也宜名達摩因改號菩提達摩師心念震旦緣熟行化時至汎重

廣州府志

卷一百四十一

列傳三十

五

溟凡三周寒暑達于南海實梁普通八年丁未歲九月二十一日也廣州刺史蕭昂具王禮迎接表聞武帝覽奏遣使齎詔迎請十月一日至金陵後隱于嵩山少林寺遇毒而卒其年魏使宋雲於葱嶺回見之門徒發其墓但有衣履而已

阮通

志嶺海名勝記云達奚司空達摩之季弟也兄弟三人同來中土獨司空未回祀之南海廟內至今猶存隋時封助利侯共有六侯皆著靈應于海上者

謹按阮通志云白玉蟾集波羅樹詩序云南海廟中波羅樹乃達奚司空所種考司空非僧也因為初祖之弟故附志于此

景泰禪師頭陀僧也不知何許人初羅浮未有僧大同中師始駐錫誅茅為庵于小石樓下居焉師甚有功行善為偈頌頗有道術役使鬼物常居山頂池上池有蔬葉師曰此泉當

與人境通因書偈投于水偈出廣州王氏池中因捨其地爲寺號曰王園寺廣州刺史蕭譽每召與語朝游南海暮宿羅浮時謂聖僧始至山中其徒以無水難之師笑而不答已而卓錫于地泉湧數尺流汲不竭人號爲卓錫泉譽因建寺于庵所題曰南樓寺師嘗說法有龍來聽人號其處爲龍王坑又於阿耨池東建塔曰凌雲又造阿耨王塔三十二所師嘗引虎豹以負瓦鉢入定而逝又有曇裕者內道場沙門也大同中武帝謂釋迦有真舍利八萬四千散在羣方遣師東來求之盡得其寶重載而歸師願居此刹有詔許焉仍分舍利造塔貯之

嶺海名勝記引李昂英景泰禪師傳

跋多羅三藏西竺人航海至廣常定中飛神峽山後經此遂駐錫焉遠近皈依法席大振時大士示現有定心泉之異又

廣州府志

卷一百四十一

列傳三十

六

感聖僧化石作獅子臺

阮通志

靈靄不知何處人傳爲同寺與貞靜俱飛來者說法化樂臺

有天香滿峽之異

禺峽山志

陳

沙門拘那羅陀本西天竺優禪尼國人後止廣州制止寺刺史毆陽頗尊禮之頗沒子紇嗣爵禮數有加陀於州內海擇一小洲四面皆水屏絕舟舫結茅爲居不入城市紇思見之親詣其地望陀所居不遠而風濤澎湃紇不敢渡陀乃鋪坐具於水面而趺坐焉凌波容與而至登岸與紇談笑經時紇視坐具絕無濕潤歎曰吾師真聖人也光泰二年陀入廣州後北嶺山告衆欲入滅道俗啼淚挽留州刺史稽顙乞賜住世師爲點頭遂迎歸本縣正園寺供養太建元年正月十一

曰爲戒弟子遂化去焚身起塔於海邊潮亭今不知所在

番禺志

隋

三寶禪師不知何處人亦未知其名字隋末居廣以其有三寶而持之因以名焉三寶者何一曰右軍蘭亭書二曰神龜以銅爲之龜腹容一升以水注之龜則動四足能行三曰如意以鐵爲之光明洞徹色如水晶然唐太宗愛書聞右軍蘭亭真跡求之得其他本若第一本知在廣州而難以勢取故令人詰僧果得其書僧曰第一寶亡矣其餘何愛遂以如意擊石折而棄之又投龜傷一足自是不能行矣

番禺志

謹按太宗遣御史蕭翼賺得蘭亭於辯才後以爲殉而古今書斷謂第一本在廣州則是此本出辯才本

廣州府志

卷一百四十一

列傳三十

七

上未知果否也禪師雅勝如此而猶不免於瞋恚耶法善隋煬帝時南海郡送之帝令宮內安置于時內造一室新成師忽升堂觀看因驚走下階回顧云幾壓殺人其夜天大雨堂崩壓殺數十人又于宮內環走索羊頭帝聞而惡之以爲狂言命鎖著一室數日三衛于市見師還奏云法善在市內慢行勅責所司驗所禁之處門鎖如舊守者亦云師在室內于是開戶入室見袈裟覆一叢白骨鎖在頂骨之上以狀奏聞勅遣長史王桓驗之皆然帝由是始信非常人也勅令勿驚動至日暮師還室內或語或笑守門者奏聞勅所司脫鎖放師出外隨意所適有時一日之中凡數十處齊供師皆赴會亦飲酒噉肉俄而見身有疾常卧床去薦蓆令人于床下鋪炭火甚熱數日而終火炙半身皆焦爛葬于香山寺

至大業四年南海郡奏云法善見還在郡勅開棺視之則無
所有拾遺記

吉藏族姓安氏其先安息人祖世避仇移居南海後遷金陵
七歲出家隋開皇末詔往慧日寺唐初勅往延興寺武德六
年卒年七十五欽定全唐文小傳

唐

休咎禪師姓梁氏新興人唐武后時遊羅浮山元和間至番
禺扶胥鎮夜憩南海廟師語王曰聞王性嚴急舟楫遇風溺
死者衆願王勿爲師受三歸五戒留住海光寺卒賜諡休咎

大師

輿地紀勝

譚公道者歸善人唐時居九龍山脩行不記歲月每杖履出
山虎卽隨之歿有徵應古傳黃氏粵咒能伏虎豈有斯術耶

廣州府志

卷一百四十一

列傳三十

八

黃通志

惠能父盧氏諱行瑫本貫范陽左降流于嶺南作新州百姓
母李氏夢庭前白花競發白鶴雙飛異香滿室覺而有孕懷
六年師乃生焉貞觀十二年二月八日子時也黎明有二僧
造謁謂師父日夜來生兒安名可上惠下能也言畢不知所
之師不飲母乳夜遇神人灌以甘露三歲喪父母守志鞠養
移來南海艱辛貧乏于市賣柴有一客買柴令送至客店出
門見一客誦經一聞經心卽開悟問誦何經曰金剛經復問
經從何來客云從蘄州黃梅縣來便往黃梅參禮五祖五祖
問曰汝何方人對曰是嶺南新州百姓祖言汝是嶺南人又
是獠獠若爲堪作佛能曰人雖有南北佛性本無南北祖令
隨眾作務能曰未審教作何務云著槽廠去祖一曰會眾傳

法弟子神秀呈偈于壁間云身是菩提樹心如明鏡臺時時勤拂拭勿使惹塵埃能不識字聞人誦之乃爲偈請人書其側曰菩提本無樹明鏡亦非臺本來無一物何處惹塵埃祖見之恐人損害將鞋擦偈曰亦未見性次日祖潛至碓房見能腰石舂米問米熟也未惠能曰米熟久矣祖以丈擊碓三下而去能卽會意三鼓入室與能說金剛經言下大悟卽以達摩所傳衣鉢授之曰衣爲爭端止汝勿傳若傳此衣命如懸絲須速去恐人害汝能曰向甚處去祖云逢懷則止遇會則藏五祖送至九江驛舍上船能隨卽把艣祖云合是吾渡汝能云迷時師渡悟了自渡祖云如是如是以後佛法由汝大行行至大庾嶺逐後數百人來欲奪衣鉢一僧俗姓陳名惠明先是四品將軍性行粗慥爲衆人先能擲衣鉢於石上

曰此衣鉢信可力爭耶惠明提掇不動作禮云望行者爲我說法能曰不思善不思惡那箇是明上座本來面目明言下卽悟而去後至曹溪又被惡人尋逐乃于四會避難獵人隊中凡經一十五載獵人常令守網每見生命盡放之每飯時以菜寄煮肉鍋或問之對曰但吃肉邊菜一日至廣州法性寺值印宗法師講涅槃經因二僧論風旛義一曰風動一曰旛動能曰不是風動不是旛動仁者心動一衆駭然印宗延至上席云久聞黃梅衣法南來莫是行者否能曰不敢于是爲惠能剃髮願事爲師時儀鳳元年正月十五日也次年春師辭衆歸寶林至曹谿堂宇湫隘不足容衆欲廣之遂謁里人陳亞仙曰欲就檀越求坐具地仙曰和尚坐具幾許闔出坐具示之亞仙唯然祖以坐具一展盡罩曹谿四境四天王

見身坐鎮四方今有天王嶺因茲而名仙曰知和尚法力廣大但吾高祖墳墓坐此地他日坐塋幸望存留餘願盡捨遂成蘭若一十三所寺殿前有潭龍常出沒其間觸撓林木一日現形甚巨師叱之曰你只能現大不能現小身俄頃現小身躍出潭面師展鉢曰你敢入老僧鉢裏龍游揚至前以鉢舀之與龍說法遂脫骨而去骨長七寸首尾角足皆具留傳寺門後以土堙其潭殿左側鐵塔是也龍骨於至正己巳寺罹兵火失去能住韶州廣果寺山中多虎豹一朝盡去遠近驚歎咸歸伏焉神秀嘗奏于朝則天追惠能赴都固辭神秀又作書重邀之能謂使者曰吾形貌短陋北土見之恐不敬吾法又先師以南中有緣亦不可違也中宗遣內侍薛簡馳詔迎請亦不奉詔遂送百衲袈裟及錢帛等以供養太極元

年七月八日忽謂門人吾欲歸新州汝等速理舟楫大眾哀留師曰諸佛出現猶示涅槃有來必去理亦常然又問此後有無難否曰吾滅後五六年當有一人欲取吾首聽吾讖曰頭上養親口裏須餐遇滿之難楊柳爲官先天二年八月初三日端坐至三更謂門人曰吾行矣奄然遷化于時異香滿室白虹屬地廣韶新三郡官僚泊門人緇白爭迎眞身莫決所之乃焚香禱曰香烟指處師所歸焉香烟直指曹溪乃遷神龕而回弟子方辯以香泥土之門人念取首之記遂以鐵葉漆布固護師頸春秋七十有六師入塔後至開元十年八月三日夜半聞塔中如拽鐵索聲衆僧驚起見一孝子從塔中走出尋見師頸有傷具以賊事聞于州縣縣令楊侃刺史柳無忝捕得賊人鞫問云張淨滿汝州梁縣人于洪州開元

寺受新羅僧金大悲錢二十千令取大師首供養柳守至曹溪間師上足令韜如何處斷韜曰若以國法論理須誅但佛教慈悲况彼求供養罪可恕矣遂赦之上元二年肅宗遣使請衣鉢供養永泰元年代宗夢師請衣鉢勅刺史楊緘云朕夢惠能禪師請傳衣袈裟却歸曹溪今遣鎮國將軍劉景崇頂戴而送可于本寺如法安置憲宗諡大鑑禪師塔曰元和靈照宋太宗加諡大鑑真空禪師太平興國之塔仁宗天聖十年具安輿迎眞身及衣鉢入大內供養加諡大鑑眞空普覺禪師神宗加諡大鑑眞空普覺圓明禪師本州復興刹宇事蹟晏殊所作碑記具載以後宋加諡廣照肉身迨今猶存後有微公居寺中頗知佛法阮通志壇經云師自黃梅得法回至韶州曹侯村人無知者時有儒士劉志畧禮遇甚厚志畧有姑爲尼名無盡常誦大涅槃經師聽卽知妙義遂爲解說尼乃執卷問字師曰字卽

廣州府志

卷一百四十一

列傳三十

十一

不識義卽請問尼曰字尙不識曷能會義師曰諸佛妙理非關文字尼驚異之遍告里中云此有道之士宜請供養有曹叔良及居民競來瞻禮時寶林古寺自隋末兵火已廢遂于故基重建梵宇延師居之俄成寶坊

謹案屈胸布華言達摩梁時持衣鉢航海至廣州後居嵩山少林寺以法傳慧可三傳僧璨四傳道信五傳宏隱六傳惠能達摩在中土爲一世故謂之六祖是時神秀在北世稱北宗惠能在南世稱南宗其徒滿天下不能備采考壇經六祖門人在南華稱大智識者有法海志誠法達神會智常智通志澈志道法珍法如令韜阮通志取其弟子中之粵東人及久住南華者附于傳後今惟傳志道神會焉

荷澤禪師神會襄陽高氏子年十三卽參六祖師問還將得本來否會曰以無住爲本見卽是生及師欲離世問衆悉涕

泣神會不動師曰神會小師卻得師滅後會入京洛大宏曹
谿頓教嘗過慧龍山奇其山水結廬於此後人因爲蘭若遇
旱潦祈禱輒應新會志

志道南海人初參六祖問涅槃經云生滅滅已寂滅爲樂未
審何身寂滅何身受樂祖曰佛爲一切迷人以常樂涅槃翻
爲苦相終日馳求乃示涅槃眞樂刹那無有生相刹那無有
滅相更無生滅可滅是則寂滅現前當現前時亦無現前之
量乃謂常樂此樂無有受者亦無不受者更示以偈道踴躍
作禮而退嶺海名勝記

一行早歲不羣師事普濟禪師時有盧鴻者齋所爲文至寺
一行一覽輒誦鴻驚謂濟曰是非君所能北面也當縱其遊
學一行因窮大衍遍遊方外中宗神龍初至岡州居圭峯卓

廣州府志

卷一百四十一

列傳三十

十二

庵山顛弟子雲元等相從五百餘人有黃雲之異因名黃雲
山張府志

謹案普濟當作普寂一行事實見新舊唐書及開元
傳信記西陽雜俎諸書皆無一行至廣南之說黃雲
山事見輿地紀勝亦但云唐一行而已疑此僧別是
一人非著大衍歷之一行舊志附會牽合不足信也
黃雲元禪師者僧一行弟子也一行嘗至新會圭峯結庵居
之弟子從者五百餘人元爲座首黃通志

金剛仙唐開成中有僧金剛仙者西域人也居清遠峽山寺
能梵音彈舌搖錫而咒物物無不應善囚拘鬼魅束縛蛟螭
動錫杖一聲召雷立震是日峽山寺有李朴者持斧剪巨木
剝而爲舟忽登山見一磐石上有穴覩一大蜘蛛足廣尺餘

四蛇嚙卉窒其穴而去俄聞林木有聲暴猛吼驟工人懼而緣木伺之覩枳首之虺長可數十丈屈曲蹙怒環蛛穴東西其首俄而躍西之首吸穴之卉團而飛去穎脫俱盡後迴東之首大劃其目大呀其口吸其蜘蛛蜘蛛馳出以足擒穴之口翹屈毒丹然若火煖虺之咽喉去虺之目虺遂倒于石而殞朴訝之返峽山寺語金剛仙仙乃振環杖而咒之蛛卽出於僧前儼若神聽及引錫觸之蛛乃殞於穴側及夜金剛仙夢見老人捧匹帛而前曰我卽蛛也願爲福田之衣語畢遂亡及覺帛已在側其精妙奇巧非世繭絲之所能製也僧乃製而爲衣塵垢不觸後數年僧往番禺泛舶歸天竺乃于峽山金鑠潭畔搖錫大呼而咒水俄而水關見底矣以澡餅張之有一泥鰍魚可長寸許躍入餅中語衆僧曰此龍也吾將

至海門以藥煮爲膏塗足則渡海若履坦途是夜有白衣叟挈轉關榼詣寺家人傳經曰知金剛仙好酒此榼一邊美醞一邊毒醪今有黃金百兩奉公爲持此酒毒其僧也僧向取吾子欲爲膏恨之深痛骨髓傳經喜受金與酒得轉關之法詣金剛仙仙持盃向口次忽有青衣小兒躍出就手覆之曰酒是龍所將來而毒師耳僧大駭詰傳經傳經遂不敢隱僧乃問小兒曰爾何人而相救耶小兒曰吾昔日之蛛也今已離惡業而託生爲人七稔矣吾之魂稍靈於常人知師有難故飛魂奉救言訖而沒衆僧憐之共禮金剛仙求捨其龍子僧不得已而縱之後仙果泛舶歸天竺矣

太平廣記

歸南者姓黃氏新會人生唐開成四年性慧知術數幼牧牛時遇旱語父老曰能以角黍相惠乎其言果雨自是叩以

禍福其應如響因以仙童呼之長益精修禪行中和九年重九日指道北大報山謂其兄斗南曰能從我登高乎既往則削髮趺坐而化里人卽其地祠之宋有立仙者歸南同里人生紹定中少好善果淳祐端午趺坐而化鄉人飾其像奉之祈禱無不感應

阮通志

僧通者與于邵爲友邵送通上人至南海便赴上都序云通公釋之秀者也生本達節出修梵行表之以威儀文之以外教始具戒于衡山之下瀟湘之間嘗以律人法雖可住而相不可住是以杖飛錫入五嶺將遠舉于羅浮尋迹于現靈扁舟而南溟漲茫茫要荒積阻動千萬里歲月之不計歧路之不悲曠哉釋子不可得攀也

黃通志

眞教禪師璿姓陳氏嘗對御陞座賜號法果禪師復奉旨往

廣州府志

卷一百四十一

列傳三十

十四

潭之道林寺咸通初從鄭僕射至廣州遂示寂

張府志

仰山慧寂通智禪師韶州懷化葉氏子年九歲於廣州和安寺投通禪師出家十四歲父母取歸欲與婚媾師不從遂斷手二指跪致父母前誓求正法以答劬勞父母乃許再詣通處而得披剃未登具卽遊方初謁耽源已悟元旨後參瀉山遂升堂奧在瀉山日有梵僧從空而至曰特來東土禮文殊却遇小釋迦遂出梵書貝多葉與師作禮乘空而去自此號小釋迦師得法後歸隱東平於唐宣宗時至廣州廣帥迎入法性寺說法度衆未幾至袁州仰山結庵居焉師將順寂時在東平數僧侍立師示偈曰一二二三子平目復仰視兩口一無舌此是吾宗旨至日午陞座辭衆復說偈曰年滿七十七無常在今日日輪正當午兩手扳屈膝言訖以兩手抱膝

而終閱明年南塔湧禪師遷靈骨歸仰山塏於集雲峯下諡
智通禪師妙尤之塔

番禺志

惠懿河北人姓陳氏咸通初乘虎入仁化駐錫大雲寺後亦
坐化有聖師塔者蓋惠立而人號之也其徒匡緒居廣州王
園寺頗能變化爲時俗所重唐曹松廣州貽匡緒法師詩云
口宣微密不思議不是除貪卽誠癡祇待外方緣了日爭看
內殿詔來時周迴海樹侵階疾迢遞江潮應井遲畢竟懶過
高座寺未能全讓法雲師

阮通志

南漢

聰公者新州人姓譚氏生南漢時自幼嗜佛往南華參禮六
祖遂爲沙彌持戒律甚肅忽一日夢祖師語曰今夜三更吾
當有難汝能救我乎其夜寺火焚至塔殿乃祖師圓寂之處

廣州府志

卷一百四十一

列傳三十

十五

寺僧移之勿動惟聰昇出山門衆大驚異常欲航海往普陀
夜夢祖云我昔有難荷汝護持汝今南行當爲汝說逢東則
住逢林則止又曰早結菩提緣能救衆生苦聰密記夢中語
遂止清遠東林寺曰往寺之西採蘆葦造筏凡數百維于江
滸邑人怪之踰旬有寇暴起入境邑人賴筏渡于南岸得免
寇退人競以金帛酬之而聰已于竹林中坐逝矣寺僧以香
泥塑其身奉之

黃通志

達岸禪師本韶州曲江人俗姓梁名志清年九歲出就外傳
年十二禮師僧慧濤爲三皈童子年十八簪剃得度年二十
先禮雲門門偃祖受具足戒乃至曹谿南遊至五羊挂塔於
訶林風旛堂南漢主人寺與語說之賜以玉環銀鉢金欄袈
裟隆禮供養師志不樂城市偶過大通濬口阻風登岸入寺

瞻禮愛其形勝請於劉主移居焉從遊者曰衆寺不能容相
與結廬田間劉主遂指帑藏恢宏殿宇賜名寶光寺南漢降
宋師猶及闡化於寶光至太平興國三年正月十一日別衆
趺坐而化靈光燭於丈室久之乃散

番禺志

宋

圓禪師姓陳福州人開寶中從樞密使李崇矩巡護南山因
入院觀地藏菩薩像問圓云地藏何以展手對曰手中珠因
被賊偷却了也李謝之淳化元年示寂壽一百三十六歲後
人建西林庵祀之

張府志

祖堂禪師夙稱禪秘戒行精專欲建靈源閣東至鐵竈山山
南黃氏夢羅漢行化旦起堂來恍若夢中所見遂厚資之入
山獲巨木閣成往惠州求記于東坡惠有古藏佛腦骨出舍

廣州府志

卷一百四十一

列傳三十

十六

利公以犀帶易之薦以白璧欲施之而未言堂歸數月一夕
夢赤蛇吐珠於壁因驚悟曰公作文成矣卽往以夢告公大
喜出佛腦舍利示之堂迎歸作金銀琉璃窰堵藏于閣上公
旣爲記又作舍利塔銘未幾堂謝事去東廡有二柏忽枯死
衆迎歸柏再榮東坡有再生柏贊

張府志

善會姓廖南漢清遠人九歲同父客潭州龍牙山出家受戒
往江陵聽經遂參華亭船子和尙歸住峽山

馬峽山志

麥祖用高要人自雲蓋山修行與浮屠居止數十年人莫得
見其面後至廣州光孝寺四方嚮慕瞻禮如市一日澡浴端

坐而化

肇慶府志

寶公俗姓也卽以爲號增城金牛都香埔塘人父興俊母葉
氏宋天聖四年正月七夜夢星入懷遂有娠不茹葷十四月

而生公時天聖五年歲丁卯二月七日子時甫離襁褓卽皈
心大教持誦佛號雖雜處樵牧中憩息樹下跏趺端坐聞鄉
峒有道場齋會瞑目神遊片時卽得餅餌以與同伴於是眾
共驚爲神以聖童目之父沒年甫十歲痛哭哀慕與姊竭力
奉母不憚勞苦年十五出家於邑之名山寺身癩衣垢主僧
惡其不潔赴齋莫與偕而公必先至寺隔江卽母家往來侍
養寒暑風雨不輟母病思食異物頃刻致之蜺有名金口者
產大海中母念食之公往卽得一夕坐郭北新橋大雨潦沒
梁柱比明則雙跣如故衣不少濡神異往往若此未嘗從師
學問而心地光徹談經說法見般若性披緇後每向姊求削
髮姊厭其煩卽自摩頂祝曰髮之有生不若無生生者有爲
不若無爲從此髮遂不生一日告於眾曰百年瞬息必有所

歸坐至三更曰吾行矣遂坐脫於瑞山石上次日邑令命主
僧率徒眾迎回寺中舉之不可動乃捐俸龕而飾之以還寺
時爲宋皇祐元年歲己卯七月十五日也計公在世年凡二
十有三寺去瑞山可三里許名證果入涅槃後凡數百餘年祈
禱必應宋淳熙七年邑久旱令唐弼者迎之至建道場求雨
卽得又慶元元年邑令黃迎禱於寺堂其年八月令廖視設
供皆感應其二年秋連雨水傷稼廖令復於八月二十日詣
公祈卽得晴民間疾疫禱無不應邑庶迎像至萬壽寺中流
舟溺失所在至晚卽出於寺前深水中元至元元年三月旱
邑令田居敬主簿關惠縣尉鄧英集士庶迎至萬壽寺得雨
於是合邑父老以白於上司奏於朝以慶元四年八月二十
一日勅賜寶公生佛菩薩坐鎮於萬壽禪寺入明香火不絕

至嘉靖三十八年八月初五日夜見夢於寺之比邱云冥冥
深夜中狂夫折我齒流血顯神通狂夫自逝已覺卽視之果
有人折傷公像之齒血流遍體立捕獲以聞邑令責之懺謝
用銀鑲復其齒像至今士庶設供祈禱無有已時蓮鬚閣
文鈔
行宣仁宗時以道行賜紫衣號證悟大師景祐間從六祖故
宅振錫來遊至吳村月華寺廢久行宣環覽周度語人曰此
地與海潮上下靈怪依焉鎮以寶坊俾伏匿無遺患也人未
以爲然俄有一龍自草莽中飛去乃芟荆榛寺之行宣戒行
嚴苦一日命其徒曰萬法有緣心從緣會吾人心緣俱竟矣
跌坐而化肉身不壞鄉民塑之遇旱禱雨輒應張府
志
祖演者雲峯庵主也不知其所由來開禧丁卯入定庵中跏
趺終日短髮金色淳祐中文溪李昉英贈以詩云一庵移向

廣州府志

卷一百四十一

列傳三十

十八

白雲堆檜栢參天少日栽頗怪髮如金線樣想曾眼見鐵橋
來佛粘土壁煎茶供官對蒲團取芋煨却笑老盧懷鉢走只
能說出鏡非臺惠守雪廬趙汝馭尤敬之亦贈以詩黃通
志

普通禪師嘉定癸未自曹谿來居獅子洞前此爲庵者多苦
於無水師竅其地得泉於榻之側其味甘冷視景泰之卓錫
無異焉故改其洞曰泉源黃通
志

神定道人從其師普通來居泉源以禪定爲業諸方學道者
咸宗之其所居曰獅子庵王胃爲之記黃通
志

惠洪覺範姓喻氏高要人少孤能緝文張天覺聞其名請住
峽州天甯寺以爲今世融肇也天覺當國度爲僧易名德洪
數延入府中及天覺去位制獄窮治其傳達言語於郭天信

竄海南島上

晁公武郡
齋讀書志

了玟曲江人出家萬華寺戒行清高性量寬洪好學博通三教典籍時諱名德領薦嗣法佛國直覺禪師歸住南華三司檄爲峽山住持禺峽山志

復庵嘉定初由衡湘浮杯駐錫龍坡山三界元通四大和合度緣餘鉢則以濟貧居民皈依爲之募財開山是爲華胥古

梵張府志

樸庵禪師道行高峻住資福寺臨化作偈曰眼前觸處是菩

提萬丈神光腦後飛六十七年虛幻質泥牛吞却石獅兒跏

趺而逝舊有真身在靈源閣上後閣廢移置法堂張府志

古溪至正間住華山寺法界清修慧性凝定自出家以至涅

槃足跡未嘗一履俗地張府志

清一叟新安人住海光寺後參學吳越徑山端禪師師具通

廣州府志

卷一百四十一

列傳三十

十九

內外典留掌書記未幾宣政院舉充韶之南華寺住持張府志

宋勅賜定應無際禪師者新會之南海人也俗姓梁戒行清

嚴理宗寶慶二年作偈趺坐化於大雲深處故老迎歸九源

寺香火之知縣王從政贊曰寫幾句偈啜一甌粥這邊天闊

雲收彼岸山青水綠新會志

德欽江右人宋咸淳間至寶林寺持戒甚嚴與譚用善莫逆

一日早起焚香沐浴更衣坐化先一夕用善夢德欽求木庵

侵晨詣之已寂累月不腐其徒與用善漆傅其肉身至今奉

六祖殿中僧元亮世其香火順德志

謹案五山志林云元時行脚至寶林蓋一時誤記

明

湧東海東莞人早年學佛於資福寺志業精勤去遊杭州聞

徑山端禪師道行高峻遂往參之留爲書記後建寺於嘉興
參禮者甚眾浙江行省丞相保捐鐵木兒夢其形貌遣人請
至與論佛法問答如響機鋒颯起丞相異之號爲慈辨禪師
洪武三年無疾而逝

張府志

曇稷南海人幼聰敏涉獵經史長束書遊名山以廣觀覽至
杭遊徑山寺因參元叟和尚始悟覺宗遂祝髮爲僧遍歷大
方詣普陀巖觀觀音現相然二指以答靈貺登峨嵋山拜普
賢現身復然二指洪武三年居光孝寺因號六指僧

同上

慧顯姓霍南海人性度慈和少夢六祖受偈得明心性住持
峽山大振宗風明正統間護清遠僧會壽八十九

禺峽山志

德清字澄印全椒人出家南京報恩寺尋入五臺樓牢山坐
劾逮繫戍雷陽歲大疫死者枕藉率眾掩埋作廣薦法會大

廣州府志

卷一百四十一

列傳三十

二十

雨平地三尺癘氣立解居光孝五年始克住錫曹谿大鑿之
道勃然中興又三年赴吳中葬達觀師返廬山結庵五乳峯
下居四年復往曹谿使與粵帥隙曠市民作難圍帥府師緩
頰諭稅使解之珠船掠海礦使驛採使來謁師爲言利害由
是珠船罷採天啟三年癸亥示寂于曹谿

番禺志

謹案德清卽憨山也

無我姓林名龍瓊山人自少出家頓悟禪機住廣州光孝寺

坐化

郭通志

永纓南海人住華山寺年八十餘茶毗之夕爲嘉靖壬戌平
生淡素不雜色相以故內養凝固一日召其徒薰沐更衣跌

坐而化

張府志

吳道人者順德人好談名理遊南海山臺寺愛其勝留棲焉

遂斷葷不娶持戒卽花卉不忍傷居三十餘年正統中忽謂
居人關振與曰我將歸矣當從火裏去爲我窖置烈火焉居
人異之顧無以難也如其言道人捉筵一拂端坐火中俄有
蛺蝶大徑尺從火裏騰空而去臨化語觀者曰不十年兵戈
四起汝曹識之後黃蕭養作亂僭號改元民多塗炭其言果

驗

郭通志

真空禪師泉南人六歲出家旣長遊關洛歷終南衡岳遇師
授解悟嘉靖己未來羅浮止永福寺時歸善葉夢熊讀書禪
林心頗異之叩其所蘊大加敬禮真空亦知夢非常人令自
識念顯晦休咎語多闕且曰數十年來當驗後至五羊止宿
光孝訶林道力大著遂廣爲眾僧說法頂禮者千餘人徙止
觀音山一日召集弟子置木龕辭眾入坐曰予將歸矣至夜

廣州府志

卷一百四十一

列傳三十

二十一

半三昧火自龕中出遂化去時庚申十月三日也後葉屢建

奇勲其言多驗云

張府志

在慘禪師新會朱氏子生而穎異弱冠執二親喪斷葷腥閱
壇經有感遂矢志參學端州上迪村有梁長者少川卜地鼎
湖山蓮花洞夢神人訶曰是朱家地非爾所有師至端州梁
遂施此地崇正癸酉始刈棘縛茅創立精舍禮棲壑於蒲澗
薙染受具服乃延杭壑住鼎湖已參方嶺以北住杭之橫山
歸繼席鼎湖戒律精嚴海內宗之旋闢麻奢寶象林以七星
巖白石造塔藏所得廬山金輪峯舍利師往來兩山成就甚
眾咸以得鼎湖戒爲重前後著述凡百餘卷藏嘉興楞嚴寺

行世

梁佩蘭撰塔志參采訪冊

函可字祖心博羅人尙書何曰纘子少爲諸生忽棄家入羅

浮江南既下坐事戍瀋陽有剩人詩

明詩綜

十力禪師者空隱和尚之上座也能詩工八分書爲人慷慨有才略少時久遊西北邊關及滇黔秦蜀多識天下豪傑與曹文詔虎大威交厚年五十始皈依空隱出家匡廬崇正辛巳從空隱說法於廣州光孝寺與二樵薛起蛟同鄉舊識梵脩之暇輒抵掌談四方兵將強弱與險要塞阨處曰汝輩經生不知興廢大勢尙擗管伊唔何爲者起蛟因叩其興廢之由曰朋黨亂於朝盜賊亂於野大事去矣不久且將革命又問李闖連營十八大者十萬小者不下四五萬已破豫楚復據秦晉意欲窺伺神京朝中貴臣多有爲其腹心者草野之民憂之久矣代興者豈卽此寇耶曰非也曰然則誰得之曰有天命者得之老僧不及見矣癸未八月十日坐化於羅浮

廣州府志

卷一百四十一

列傳三十

二十二

次年甲申懷宗殉國宏光偏安江左不久亦亡而我

朝天命建元其言悉驗

事觚

棲壑和尚道邱字離際順德龍山柯氏子母陳氏夢老僧偕宿而娠生時室有異光少志願出家薙染後侍憨山大師於寶林通內外典籍遂辭憨師度嶺至金陵親雪浪一雨深究宗趣令爲嗣講復如杭參蓮池大師師授以淨土法門并付衣鉢後入江右侍博山無異和尚久之又入匡廬會同參家宗保禪師於金輪歸廣州聞者爭謁陳子壯梁朝鐘延住白雲蒲澗學者輻輳共坐枯木床種田博飯一日訪六祖新州路出端州望鼎湖山水秀麗策杖而入知爲福地遂開山焉先是地主梁少川與清波延僧構其中共結淨社招陽朱子入主之聞師至奉爲住持遂成大刹內有涅槃臺慶雲禪院

寮舍僧房非萬金不能建師談笑而成之愍大師曾遊此峯
懸記曰不久有至人於茲開山記以詩曰蓮花瓣瓣湧滄溟
寶殿高高傍七星白晝雲封無犬吠夜深說法有龍聽至是
果驗嘗至數百眾寺無擔石之儲所給皆付龍天方伯胡嘗
與監寺雲儔募金千兩有奇擬置田齎金入山師卻不受立
不置田產之約謂釋子修行龍天擁護四字自足何用田爲
而開山十年用度未嘗困乏殿前波羅樹枯萎師咒水灌之
復茂重修大雄寶殿大木來自海隅難於轉運忽而大雨如
注三日溪水暴漲丈餘木直抵山不越月而梵宮成後白蓮
花盛開師無病索筆書蓮花頌而逝

五山志林

石洞禪師名元覺字離幻晚居石洞因以爲號焉平陽本陳
國師法孫雲門宗符禪師嫡嗣順德簡氏子也從宗公剃度

廣州府志

卷一百四十一

列傳三十

二十三

禮鼎湖山棲壑和尚圓具以大事未明徧參諸方往來吳越
叢席承事名宿多見許可旣而歸覲首眾華林親受記荊平
生坦懷接物禪律兼通四方學者多從之遊宗公示寂師繼
主法大興雲門之道會下千指未嘗輕易許可晚年厭煩劇
暫別華林住靜循州一日遊羅浮道經石洞愛其巖壑高深
築室居焉其徒跡刪鷲從之遊躬耕洞中有終焉志師資契
合相與遊戲翰墨以文字而作佛事所著有石洞遺書咸陟
堂前後集並行於世師示寂後跡刪下山雲遊庵宇遂圯遺

趾尚存

羅浮山志會編

崇範名宏戒新會城人俗姓余少習舉業見其母信佛範亦
篤信常爲人訟或教詭詞以辨範唯唯及對簿卒持已說樸
訥不能自直遂受杖或尤之曰如汝所教非妄語耶後棄家

祝髮依鼎湖門下戒律精嚴喜放生山行但跣足懼傷螻蟻
聞虎傷人惻然夜起披衣持鉢入空山中爲虎說法戒虎亦
不敢犯吳中玉林和尚聞其名南望稽首曰此西方聖賢也
年六十餘端坐而逝

張府志

性顯錦巖山東庵住持也順德人東庵與陳邦彥故居最近
素交厚邦彥在錦巖山起事時性顯願統兵一枝隨行後守
清遠城李成棟攻陷性顯巷戰力殺十餘人後援不繼爲亂

兵所斫

陳巖野文集

空隱禪師名道獨字宗寶博山無異禪師法嗣南海陸氏子
也生三歲母抱登樓覩蜘蛛結網瞪目久之悲喜不禁晚自
言四五十年來回憶不加毫末其夙根如此六載失父隨母
居近寺聞梵唄音過耳成誦從老佛知見性成佛語益切嚮

廣州府志

卷一百四十一

列傳三十

二十四

慕得六祖壇經不識字懷襟袖間懇禮大士一夕拜下疲倦
倒地忽覺身騰空中汗透毛吼張燈取經讀之彷彿認是某
字詢之人果然遂數行俱下年十四習定樹下忽空中如劈
竹信口成偈云兀兀圓明體騰騰物我如此是無生路無生
更要離事母至孝母病須山泉日肩擔二十里母卒廬墓三
年乃以二十九歲入博山博山異之呼入方丈與語竟夕一
日以倒騎牛入佛殿話命眾下語師呈頌曰貪程不覺曉愈
求愈轉渺相逢正是渠纔是猶顛倒蟻子牽大磨石人撫掌
笑別是活生機不落宮商調山頷之始與易名登具足戒囑
曰汝他時不得辜負山僧也師掩關金輪復從黃巖一意住
山無出世念粵東宰官請住羅浮開博山法門閩人以雁湖
延師復請住西禪所至道風徧洽後掃博山塔杖錫還粵由

海幢返芥庵自剋去期趺坐而逝

羅浮山志會編

元亮號浩則順邑寶林寺住持俗番禺黃姓少貧爲傭工十六歲出家始讀書後能詩善大字開法寶林當事薦紳多敬禮之將示寂先臘徧請居士與訣自謂明年正月十五當涅槃副寺以木龕未就請延時日浩則爲改二月初二囑副寺速工作龕至期又以漆水未乾再延浩則躊躇半晌復請二十四日決行矣屆期諸山畢集卓午命法堂撞鐘擊鼓示語云世界看空似過雲水邊林下絕囂紛浮屠擁護心爲壯此外餘情不欲聞盤膝合掌端坐而逝時世臘五十三歲梁靈長時年十六親見之

五山志林

函是禪師南雄曾氏子初名起莘舉崇正癸酉鄉薦與陳學佺友善砥礪名節甲戌同佺上公車歸而佺病卒莘痛良友

廣州府志

卷一百四十一

列傳三十

二十五

云亡求了生死晝夜苦參豁然有省時空隱和尚得博山之傳隱廬山黃巖莘往參學得蒙印證遂削髮爲僧法名函是父母姊妹妻子咸爲僧尼壬午緇白請開堂訶林丙丁戊己後粵變屢更師叢席愈盛每闡發禪理三教同源聞者莫不喜悅住雷峯時平南王尙可喜慕其宗風以禮延之師一見卽還山人服其高峻長慶歸宗二古刹並請開堂師以匡廬夙緣暫住歸宗旋卽退院居棲賢丙寅夏返雷峯詠詩有牀前休問菊花期之句及八月二十七日作偈投筆而逝年七十八師以盛年孝廉棄家出世人頗怪之及時移鼎沸縉紳遺老有託而逃者多出其門始知師有先見云

南海志

謹按天然和尚逃儒入墨師事空隱丕振洞宗其時禮空和尚者有函諸字言者東莞戊辰進士禮部侍

郎王應華園長也函聞東莞明經王應芋崇芳也函
又字安老南海人都督同知鄺日晉無傲也函美字
于斯番禺丁卯舉人職方司主事黎遂球美周也函
全字全人南海癸酉解元陳學佺全人也函機字妙
明番禺壬午舉人南昌郡丞羅賓王季作也皆與天
然爲佛門曩季其禮天然者則今忭字高齋湖廣甲
戌進士都憲袁彭年特邱也今宣福建癸未進士副
憲何運亮紫屏也今悟字了閒番禺人戶部員外謝
長文伯子也今葉字開五番禺文學王瑯澹子也今
報字薦元香山人兵部職方司主事楊晉二雪也今
象字乘白番禺文學梁聲駿郎也今吼字說作番禺
副貢王邦畿誠籥也今晴字迴無番禺明經李廷標

鴻子也今元字具三番禺文學麥侗之六也今心字
目青新會文學英上卓今也今一字萬間南海壬辰
會元桂林知府程可則周量也今莖字草一番禺明
經羅龍祥德若也今傅字當來番禺乙酉舉人彭鈺
崑玉也今舒字舍予番禺文學林夢錫叶元也今彭
字遠公番禺明經黎彭祖務光也今延字宣公番禺
恩貢黎延祖方回也今楸字樸門番禺隱士謝楸惟
秉也今趣字淨德番禺副貢何國相良哉也今揚字
揚公番禺文學張審鵠孟發也今鷺字月藏番禺舉
人樊應元長文也今豎字亞目番禺儒學教授潘棊
元浣光也今燄字若雲南海明經龐嘉耄祖如也今
濟字蕩虛番禺隱士崔植培生也今載字大車番禺

隱士麥定元正言也今惺新會布衣湯晉建孟也今濟字法航番禺文學謝振翹厥搖也古根字靈杖番禺布衣高嘉學斯啟也古若字若蓮番禺布衣王鎮遠虎拜也古混字知處番禺文學李蜚粵長吉也古行字敦菴番禺明經朱衡少平也古聰字大持番禺人候選州佐何王捷少軍也古記字當荊番禺布衣黃燦間如也古頑字靈洲番禺隱士謝儼望畏也古峯字石人新會布衣何九淵澤四也古深字自得番禺中書衛文英傑元也古穎番禺布衣許穎識微也古贄字鏤白番禺文學林上達苑君也古菱字二菱番禺文學許城清漳也古瓚增城文學陳濫夔石也古意字悟非龍川舉人劉久初長孺也古媚字宛在

廣州府志

卷一百四十一

列傳三十

二十七

番禺隱士謝楷儀世也古童字十真順德文學張蓋都直咨也古聲字無聞番禺文學梁逢聖達子也古翼字輔曇番禺布衣王隼蒲衣也古咸字無物番禺隱士韓嘉謀旅庵也又今種屈大均字一靈今口李成愚字雪床今墮黎啟明字止言阮通志未載者

國朝

阿字禪師今無得法天然是和尚番禺萬氏子父諸生以株連坐繫爲禁卒拒弗使進飲食師哈卒書金券得再飽俟尹出遮道大哭尹愕然憐師稚小乃問狀判牒取釋師曰遲則必斃尹喻意乃立出之禁卒歎曰吾遂爲孺子賣年十六抵雷峯依天然得度十七受壇經至參明上座因緣師初以貧廢學侍峯得徧閱內外典十九隨峯入匡廬中途寒疾垂死

夢神人導師出世師以鈍辭神授藥粒覺乃甦從此思如泉湧通三教信筆注三祖信心銘諸耆宿皆遜之年二十二奉師命出山海關千山和尚一見深器重之每罷參與語自春徂秋頓忘筌蹄三年渡遼海歸廣州遊奇甸邁兵變有欲假渠魁以中師者其黨忽就擒計師從塞北涉瓊南艱阻備嘗胸次益瀟洒廓落再依雷峯一旦豁然住海幢十二年癸丑請藏入北過山東聞變駐錫蕭府乙卯回海幢手疏楞嚴輯四分律藏大全辛酉元旦有收拾絲綸返十洲句九月卒世壽四十有九僧臘三十

阿字禪師語錄

今回禪師俗姓王名鴻暹少宗伯應華次子初宗伯夢幢幡下碧落而誕生時桂香滿室因名桂及長至立能詩善畫蘭竹不屑世事宗伯既葬遂棄諸生爲僧往來羅浮雷峯間

張府

廣州府志

卷一百四十一

列傳三十

二十八

志

卽覺法名今離黃浦人俗姓黃少孝友言動不苟年十九補博士弟子員與從弟眞佛每月朔率同學集文昌宮檢舉身心功過讀法華經有省遂披緇出家隨天然入匡廬脩行勤苦一日聞鐘聲得悟天然許之將付法偶示病自知時至出別大眾說偈曰懸崖撒手風猶晚未上山時意若何遂合掌逝其從弟眞佛亦棄諸生挈其子角子出家法名今如云

張府

志

今辯字樂說番禺麥氏子兄弟四人皆有文名師季子也家貧事母孝嘗學帖括于梁之佩之佩者卽海法禪師也導以內典梵行忽有所省求行脚僧引至匡廬參天然求爲薙染庚子還雷峯受具澹歸禪師闢丹霞迎天然開剌法席師劬

維甚力鞠明究曠脅不沾席者數年從此悟入戊申解下悟
以大法分座丹霞乙丑天然示寂主海雲海幢兩山未幾應
西粵永甯之請奉三世語錄入藏會福州紳士請繼長慶師
翁之席師從浙入閩鼓山爲霖和尚慎于許可惓惓屬師丁
丑示寂長慶白衣弟子陳宗栢建塔于慧楞禪師之左有四
會語錄菩薩戒經註疏行世

海雲
禪藻

今壁禪師本姓溫字仍千東莞人能詩工楷書後住匡廬一
見空隱遂悟禪秘與石鑑今覘具五今莖並有名

張府
志

今佛字千一新會人李姓邑諸生慷慨節烈士也世亂父爲
豪猾所害闔門老幼皆被其僇佛匿山澤間得免潛避親串
家日夜思報父仇久之猾亦輕其孱息不復置念單騎出入
自忘戒備佛藏刃懷中詞伺得間一日遇猾道左立割其胸

廣州府志

卷一百四十一

列傳三十

二十九

割其首鳴之于官官憫其孝原之遂易服禮華首老和尚剃
度受具充芥菴監寺後事天然爲棲賢典客卒于丹霞

海雲
禪藻

今端字毫現新會蔣氏幼爲章縫之士生長富室衣絲曳綺
持梁刺肥晚好茹淡服素視家世豪華忽如朝露初易儒服
于雷峯遂稟具隨天然主法丹霞推爲龍護園主龍護乃丹
霞僧郵居雄州孔道能接待十方雲水久之返雷峯教習諸
初學手不釋卷休老而終其子一子相繼出世爲寮元

海雲
禪藻

今錫字解虎新會人俗姓黎原名國寶邑諸生少脩梵行有
出世之志遇天然卽求脫白受具初爲海雲典客會阿字大
師分座海幢營建方輿百務叢集監院甚難其人禪師命錫
充之左右劬維法門大振尋遷都寺性慈和生平無厲色暴
聲與人殷殷有眞意工行書臨帖以指畫襟襟爲之穿其子

月旋亦依止海幢並稱耆德

海雲
禪藻

今沼字鐵機番禺人天然禪師族姓原名暉字自昭少餽諸生名聞鬢序有至行篤于友誼庚寅喪亂室廬妻子陷于危城子身漂寓深自悔匿無復有人世意研窮儒者之學規行矩步皆有準繩晚讀楞嚴經始洒然超脫于是入雷峯結茆室與友人麥具三閉關三年時天然居雷峯雷峯方興土木沼出輔旋菴湛公募化殿宇落成戊戌迎天然返錫庚子開戒與石鑑禪師同日受具命司記室尋升按雲堂師勘驗精嚴鉗錘交下如青天雷鳴不可掩匿舊習頓喪隨杖居東官芥菴益自淬勵一夕坐亡緇白爲之哀悼沼于書無所不覽工行楷詩長于古尤工駢麗之辭有集行世卒年四十五

海雲

藻禪

廣州府志

卷一百四十一

列傳三十

三十

今覲字石鑑新會石洞人本姓楊居西塾初名大進字翰序年十五補郡諸生弱冠講陽明之學崇正甲申聞京師陷卽訪求天然和尚論儒佛異同不覺心折鼎革後遂謝諸生會空隱和尚自長慶還扣擊頗銳逾年復見空隱于海雲順治庚子落髮雷峯天然授以大法豁然開悟甲辰舉西堂頷眾之棲霞閩僧迎住長慶半載復返棲賢嘔血而逝

岡州
遺藁

今楮字記汝新會人番禺諸生潘楫清字水因者也將及歲薦適以憂解服闋棄諸生從天然受具辛丑爲雷峯典客後隨杖住丹霞充記室再從天然住歸宗性耽山水有孤峯獨宿之誓愛香山鳳凰峯孤擎海角人跡罕至蛇虎馴擾結茅憩焉遇靈雨瀑漲茆茨衣具一夕漂盡人咸以爲死矣數日樵豎入山顧見一人依樹下舉衣向日自曝歸而言之楊長

者二雪亟遣人迎至其家楮堅請還山楊君復爲結構丈室于爽塏孤居十餘年不與人接參究之暇間疏韻譜諧聲協律精研奧博累數十卷大爲詞流所重乙丑天然入涅槃復返雷峯悽然有戀慕之意使人焚毀所居庚午還古岡訪尋故舊忽示微疾作書別諸同學擲筆端坐而逝遺命閣維颺灰巨浸道侶擬函骨歸雷峯普同塔又復見夢乃如囑颺于江水楮白衣豪放嗜酒任俠急友義出入危難忘身濟物不可更僕數故能超出如脫屣有借峯詩稿嶺南花逸韻譜行

世海雲
禪藻

今毬字雪木東莞尹氏子生長名閥幼知向上宗門童年子身皈雷峯爲沙彌供汎掃辛丑受具選侍司嚴奉毘尼學通宗說而惟慈煦謙遜若不及與人言輒面赤恐有所失澹歸

廣州府志

卷一百四十一

列傳三十

三十一

和尚期許特至自言于澹公語錄多所默契云隨天然七住道場未嘗少離惟居丹霞時嘗一充龍護園主而已泊天然示寂後依樂說和尚自粵西至七閩笠杖相從者數年比樂和尚示寂長慶則依鼓山爲老和尚生平無一日離善知識會下晚自長慶歸丹霞有法喜友欲贖其行知不可卻潛附他舟行乃遙報曰偶遇便航行不及別矣其耿介多類此有士人書金剛經資薦其母夜夢冕而蔽者語曰書經千卷不如雪木禪師口宣一卷其爲幽冥所重預可信矣辛巳訪舊雷峯暫憩海幢掃阿公塔邁寒疾而終僧臘四十一世壽六十著有懷淨土詩十六首

海雲
禪藻

古詮字言全番禺人黃姓少負夙慧力學好古素聞天然以宗門事接引後學束身來皈求薙染受具執侍勤謹天然愛

其誠樸念華首爲空老和尚建椎地非高行衲僧不與慈選
特命詮領院事至則剔蕪芟穢斂租輸稅頗殫心力以疲勞
咯血病蛻于華首天然有詩悼之

海雲
禪藻

古電字非影新會李氏子幼隨母出世依天然庚子登具報
侍服勤三十餘年寒暑靡間天然住丹霞行募江右辛亥住
歸宗復行募吳越比還雷峯屬典庫藏凡事皆肩荷向前不
遺餘力每一參請必膝行胡跪語十許轉天然深契之居棲
賢獨肩常住之務樂說和尚稱其無愧于行解相應法苑長
城天然入涅槃未蒙記荊樂公勸梓其石牕草行世蓋不欲
其陸沈眾中露其一班云爾世壽五十五示寂棲賢

阮通
志

古義字自破新會人俗姓盧出世丹霞歷諸上刹皆典重職
雅好游泳居海幢客寮方外開士無不知有破公者性嗜茶

廣州府志

卷一百四十一

列傳三十

三十二

所居列佳茗第其上下著有茶論一篇挂錫名山雖多然住
亦不久晚隱新州竹院瓶笠蕭然意泊如也後聞角子和尙
繼席丹霞策杖來歸竟終于丹霞所著有詩百餘首

阮通
志

古易字別行番禺崔氏子族本儒家性沈毅精敏與從父廣
慈大師同師天然和尚弱冠有脫白之志父兄難之天然卻
而弗許歸家自髡其頂衣壞色衣修持梵行逮終養後挈其
婦與一女一子相繼稟具初爲雷峯殿主遷典客尋掌書記
優游禪寂足不履戶外數十年體素尪羸有咯血病雅善調
攝得幾中壽尊禮旋菴湛公恩如父子因旋菴極口稱丹霞
之勝扶病一往其信向若此臨化以手枕卧順適而終子味
囉多公相繼爲雷峯殿主俗居聚落與海雲林巒相望父子
道念之篤若有所薰習也

阮通
志

古檜字會木番禺許氏性至孝童子時因大父喪擗踊盡禮竊念有死必有不死者在翻起疑情時塾師方督課嚴且淺陋無可咨決尋遭父喪哀毀成病危苦中感觀音大士夢中示現大呼名號者數若脫微纏行不死遂誓斷葷腥壬辰從族叔入雷峯禮天然禪師適範金鑄迦文尊相起信益篤有脫塵之意癸巳遂堅求出世時年十七丙申從廣慈大師抵匡廬戊戌天然還自棲賢留守丈室己亥趨還雷峯登具復返廬山自是行脚歷白門九華牛首天台諸名勝徧遊諸方歸值天然主法歸宗爲一眾募食至浮梁遇水災棲止一樓斷烟火數日諸行募者持空鉢而返檜獨操輕舟載十餘石歸澹歸和尚有序壯其行比歸休雷峯身任典客二十七年化導有情推誠忘我與名輩爲方外交人皆稱爲木典客而

廣州府志

卷一百四十一

列傳三十

三十三

不名臨涅槃時

稱觀世音名號隨順而化有夢餘草一卷

行世

阮通志

成鷲字跡刪番禺人明孝廉方國驊子鼎革後國驊隱居授徒世稱學守先生成鷲年十三補諸生年三十五父故後婚嫁畢別母學佛于鼎湖晚棲大通古寺號東樵山人一時名卿鉅公多與往還藩使王朝恩學使樊澤達給事鄭際泰盛譽之名益顯詩文最富所著咸陟堂前後集識者謂其筆響風雷崩山立海凡蠻烟瘴雨渴虎饑蛟草木離奇劍嘯芒飛直歸紙上浙西陳元龍謂成鷲墨名而儒行其文發源于周易而變化于莊騷涵負呈豁辯才無礙其詩在靈運香山之間時以爲非阿好成鷲戒律精嚴道範高峻與貴人遊道話外公私一無所及遇家人輩有所諮瞑目趺坐寂然若無聞

也年八十餘卒番禺縣志沈德潛國朝詩別裁上人姓
爲僧所著述皆古歌詩雜文無語錄偈頌本朝
僧人鮮出其右者擬之于古其惟儼秘演之儔歟

六祖而後興光孝者惟憨山憨山初至粵人無識者惟六逸
法師知之法師姓何氏三水人竟傳憨山學同學通訶本西
樵陸氏子甚爲憨山所器重能繼憨山世所謂寄菴大師是
也先是光孝寺繼席賢哲洪武初則六指僧曇稷成化中則
定俊上人秀峯禪宗法器成化中則普習覺異正德中則靜
山圓法俱有時名同時有名小坡善麥指揮因以請藏經今
大藏完於寺者小坡之力也雍正間有敏言法師名元默卽
今住持圓德之師也元默號葆菴九江馮氏子與惠學使士
奇爲方外友多唱酬圓德名成鑑亦能詩與書諸僧事蹟具
光孝志畧見其名於此焉番禺縣志

廣州府志

卷一百四十一

列傳三十

三十四

古雲字雲菴俗姓周師增城舉人湛子雲得甘泉心性圖深
窺其奧乃棄諸生走海幢從阿字出家時金給事堡亦著僧
衣在海幢古雲因請堡以甘泉心性之學及白沙靜定端倪
之旨堡曰我亦從此來良久再問堡卽起去古雲沉吟曰此
老從儒來所學飽飫豈欺我哉遂盡焚書籍筆硯一意修靜
益信陳湛所傳爲不虛矣後繼阿字主海幢年八十入寂古
雲得法門人有四傳釋字非鈴傳漁字智壑傳嚴字慧輪傳
晟字麗南慧輪住海幢麗南住雷峯焉番禺縣志
古奘字願來小字拾影號影堂新會古岡人俗姓湯吳逆之
亂兵入粵湯氏一門三十餘口遇害古奘方在襁褓婢負之
墜樓逃置草坡僧惟一遇之偶見其影因拾得養之名拾影
四歲能賦白蓮詩共稱再來人長參角子禪師初粵僧惟空

隱一派爲盛空隱傳天然天然傳阿字澹歸阿字開海幢澹
歸開丹霞其長慶棲賢皆天然之徒分住中多隱君子不遇
於時有激而遁者不欲留姓氏於當世角子名龍其父今如
乃新會黃秀才角子童年受道法繼阿字住海幢一夕夢唐
僧陳元奘入室明日古奘來叅語甚合因附衣鉢立爲首座
改名古奘應夢也角子入丹霞古奘遂往海幢性至孝念家
破值已生日哀感經旬門弟子不敢以師誕語人所著有虛

堂詩集蠹餘集

番禺縣志

大瞻字杲亭粵中詩僧也本南海人靜穆溫雅有道風楚人
韓矩稱其詩格高調老與貫休齊已抗行乃序其集云五嶺
之詩僧自蒲澗澹歸兩人外繼之以跡刪心月皆鉢腎鏤肝
爲遠近詞壇所重而師與松衣敏言則後出之皎皎者師年

廣州府志

卷一百四十一

列傳三十

三十五

來參究四方吳越荆楚數數遊遇江山風月之佳勝擷秀採
華收於瓶鉢詎非方外偉人以視面壁枯禪不能道明鏡臺
字如迦陵之視暗雞矣

番禺縣志

傳晟字麗南順德李氏子師古雲後居雷峯雷峯之復興由
傳晟嚴重不苟言笑正法簡易人多樂從與人交和直坦易
緇俗悅服工書得右軍十七帖筆意亦頗能詩與邑孝廉車
騰芳相愛厚其寂也爲銘其塔

番禺縣志

古通字循圓新會梁氏子原名國楨字友夏郡諸生性謙謹
與初學言輒自稱名以亂隱居于鄉閉門却掃與妻子修淨
士之行人雷峯薙髮乙巳受具初典書疏未幾出充雷峯下
院主天然念其老令還本山訓課功專心勤雖耄不倦坐蛻

山中道俗悲之

海雲禪藻

古行字克躬新會人生爲循圓族弟童子時與足兩同鄉塾世亂乘去慨然思出世養親至歿卽入雷峯受具行募于吳楚閩越中積有勤勞丙辰嶺外阻梗天然念棲賢困阨音問闊絕間關無可使者行毅然請往至淨成順化

海雲
禪藻

古鍵字鐵關新會胡氏子有祖名受僧者至鍵果出家而祀絕甫十八卽出世雷峯辛亥始登具初欲入棲賢依天然至海幢爲阿字大師留掌記室尋升典客丁丑復居雷峯掩關有比丘香雲刺指血求書華嚴經鍵暑月披衣長跏繕寫精勤過勞得咯血病遽示寂尙餘數卷未獲卒業

海雲
禪藻

今嚴字足兩新會羅氏子原名殿式字君爽邑諸生與兄寅皆有文名爲梁朝鐘梁祐達小友弱冠從天然禪師求生死大事已丑脫白受具其母頗知書相繼落髮嚴性孤高好潔

廣州府志

卷一百四十一

列傳三十

三十六

非其人雖貴游不肯晉接居雷峯丈室最久戊戌詣嘉興請藏還至歸宗閱大藏一周歲饑日僅食匙糜以病還雷峯愛棲賢山水扶病强行竟蛻于玉乳峯靜室嚴道念甚深知解明敏有西窗遺稿一卷秋懷百合諸詩尤爲世所傳誦

海雲
禪藻

今印原名瓊字佩之更字海發順德逢簡梁氏子家貧嗜學少與吳煒梁佩蘭友善通試東莞及本籍並居首號補庠生先是戲爲人搆一藝錄之輒冠其曹遂自悔欺冒乃自試旣售屢躓場屋館西粵歸而母死哀慟吐血垂絕而甦自是銳志修道步入匡廬皈天然落髮受具研究至於忘身隨師還粵復返廬山掌書記確有證入行脚至黃州天章付以大法由陝西入都某叢林迎請住持時徒眾甚盛當事慮惑眾問能移堂前樹乎海發卽三叩其樹曰根深不可移也一日跌

坐集眾語曰西方淨域近卽靈臺物欲不滓洞見天心語畢
遂寂有羣鶴繞寺弟海岸亦海幢寺名僧

據六瑩堂集海雲禪藻參修

謹按相傳海發出家在戊子其年元旦同鄉黎象斗
夢錦鯉海有紫氣接空語其子海達曰海發文佳甚
今科必得魁首後始知爲修行之兆

寒山者不知何許人居錦巖山西庵作錦巖靜悟詩六十四
首語或儒或釋精深奧衍與東庵僧性顯動止各殊

據巖野文集及

錦巖志
畧修

開詞字慧弓號石箭張氏子年十七出家禮在和尙於金龍
精舍二十受具研究經律多所發明後赴粵西歸至平樂而

寂

粵東
詩海

知通桂林抖塵寺僧少貧與妻黃長齋念佛坐白蓮教累陷

廣州府志

卷一百四十一

列傳三十

三十七

獄百八十日官廉得其無辜出之贈以金遂削髮爲僧守其
金誓非大事不用乾隆戊寅歲饑斗米錢二百餓殍盈道知
通出其金權之得七十兩付鄉耆舉賑多賴以活縉紳重之

五山
志林

慈湛順德龍山陳氏子出家爲覺浪老人入室弟子能敦實

行不以布施惑人

順德
志

自渡江右僧也遊方入嶺至順德居西山下西華菴先是官
指揮爲賊傷折右腕能以左腕持筆善畫人物花卉尤長牡
丹未幾死羅天尺讀書其地夜有憑軒袖手吟詠者僮僕偶
見之時過從無人或以爲自渡客死精魂未散也

順德
志

成鑑號圓德潭義劉氏子時訶林僧薛元默號葆菴稱敏言
法師者與學士惠士奇結方外交多唱酬成鑑師之亦幼知

音律善書有詩名琴理甚深既而嗣法觀音堂堂訶林十房之一也主其房席遠近縉紳至者皆與通問大吏亦折節禮之嘗修光孝寺志

光孝寺志

源子順德縣城北吳氏子質性高邁爲僧居省城河南之海幢寺雍正初奉天楊琳來節制兩粵其子應琚隨侍與遊頗相得嘗偕入羅浮各有題詠源子恃才傲物蔑視同輩與衆不合晚退居小金山迨應琚來繼秉節源子已圓寂久矣至今寶林寺尙藏其羅浮詩稿

據五山志林及光孝寺志修

趙棠本蜀人孟氏節度使廷隱之後今爲南海人仕至幕職官南海有潘冕者佯狂不測人謂之潘盜南海俚語謂心風爲盜盜嘗與京師言法華偈頌往來言云盜日光佛也先生棄官從盜遊盜謂盡得我道盜既隱去不知其所終而先生

廣州府志

卷一百四十一

列傳三十

三十八

亦坐化焚其衣得舍利數升蘇軾與先生之子昶遊得舍利四十八粒盜與先生異迹極多張安道作先生墓志具載其事昶爲大理寺丞知藤州元豐三年十一月十五日以舍利授寶月大師之孫悟清使持歸本院供養

東坡文集

許道人洋沙許東齋女也幼有超塵之志父母禁之不可遂清齋入道先是碓石和尚創庵梯山號張道人庵至是脩而居之經年獨處有虎常衛其廬

張府志

蔡公東莞恩德里人嘗憩慧雲寺喜齋僧供佛一旦齋沐踰跌而逝蓋棺三年其子將卜葬忽聞叩擊聲啟視之已起棺中扶真之坐儼然如生真身尙存紹熙三年邑宰張勳迎之禱雨輒應爲置祠于寺中立碑記其事真身今在鳳凰村

張府志

志

謹按趙棠蔡公二人皆奉佛者今從佛門居士之例
附于釋氏之後

黃道姑者新會人女釋也生于皇祐間父母富而無子惟道
姑承業性少慧因有所感遂不適人工紡績買田萬頃施于
廣之光孝韶之南華及開元東禪西禪仁王龍興諸寺而光
孝尤多紹興元年卒年八十三光孝僧爲立祠墓左卽圓明
莊聚寶庵也

黃通志

南海李徵霽分纂

番禺史悠履初校

番禺史悠乾再校

番禺金佑基三校

南海顏以湘四校